

大學翼真

漢	書	門
八	四	九
八	四	九
冊	架	函
號	類	

漢	書	門
八	四	九
八	四	九
冊	架	函
號	類	

四書目

內閣文庫	
番號	漢 8493
冊數	8 (1)
函號	274 43

274-43

0 1 2 3 4 5 6 7 8 9 cm

Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19

G Y M

© Kodak, 2007 TM: Kodak



德清胡渭著 同邑戴上鏞校刊

大學翼真


小酉山房藏板

欽定四庫全書提要

臣等謹案大學翼真七卷

法法入庫

國朝胡渭撰是書卷一分四目曰大學二字音義曰先王學校之制曰子弟入學之年曰鄉學之教卷二分三目曰小學之教曰大學之教曰學校選舉之法卷三分三目曰大學經傳撰人曰古本大學曰改本大學皆引據精核考證詳明非空疎游談者可比卷四以下為渭所考定之本大目仍以朱子為主方闢王學改本之誤以經為一章傳為八章其誠意章以下與諸本竝同惟以康誥曰至是故君無所不用其極為第一章統釋三綱領以詩邦畿千里



3A - 179

大學翼真
至此以沒世不忘也為第二章謂前三節釋經知止能得之序後兩節釋知止之由與能得之序以聽訟吾猶人也一節為三章釋本末之意而移此謂知本二句於前章止於信之下與諸本為異其說與朱子雖小異然僅謂格致一章不必補傳耳其論格物固仍然朱子之旨也其卷末一條謂古之大學所以教人者其文則詩書禮樂其道則父子君臣夫婦長幼朋友其法則博學審問慎思明辨篤行故孟子謂庠序學校皆所以明人倫云云所見切實視泛為性命理氣之談似五常百行之外別有一物謂之道別有一事謂之學者勝之遠矣

大學翼真目次

卷一

大學二字音義

先王學校之制

子弟入學之年

鄉學之教

卷二

小學之教

大學之教

學校選舉之法

卷三

大學經傳撰人

古本大學

改本大學

卷四

經一章

卷五

傳一章至傳三章

卷六

傳四章至傳五章

卷七

傳六章至傳八章

大學翼真卷第一

德清胡渭輯著

孫男彥昇校定

大學二字音義

禮記凡四十九篇其第四十二曰大學陸德明經典釋文云大舊音泰劉直帶反音代劉昌宗三國魏人撰禮記音五卷與王肅孫炎李軌徐邈同時則固有兩音矣朱子大學章句云今讀如字從劉音非臆說也音既不同義隨而變蓋音泰者主學官而言天子之辟靡諸侯之類宮是也讀如字者主教術而言大學之書名及所言三綱領八條目之事是也案釋文條例音堪互用義可竝行者靡不畢書故學記言大學者五皆音泰王

制大學在郊亦音泰與篇中大師太祖天子大樂正等同
而此篇獨兼存劉音是知言豈一端各有所當學者宜審
義以定音不可執一而論矣又孔疏引鄭目錄云名曰大
學以其記博學可以為政然則康成早以博學解大學書
名讀如字又不自劉始也有疑章句為臆說而欲改從舊
音者亦考之不詳耳

學官當音泰書名當讀如字恐亦是三國時翻切盛行
後強生分別原古作者之意大字只與小對言即方音讀
此字者或輕或重微有不同而其義則一也釋文條例云
方言差別固自不同河北江南最為鉅異或失在浮清或

滯於沈濁今之去取冀祛茲弊亦恐還是音更成無

辯夫質有精麤謂之好惡並如字心有愛憎稱為好惡上呼報反

下鳥路反當體即云名譽音論情則曰毀譽音及夫自敗薄邁反

敗他補邁反之殊自壞平怪反壞撤音之異此等或近代始分

或古已為別相仍積習有自來矣大學之大或音泰或讀
如字正陸氏所謂近代始分還是音更成無辯者也

朱子章句序曰大學之書古之大學所以教人之法也上
大學謂書名下大學謂所學之官辟廱頴宮是也古者因

教法之大小以名其官其義則尚書大傳云十三入小學
見小節踐小義二十八大學見大節踐大義方慤曰小學

所以處學之小者大學所以處學之大者盡之矣自呂與叔解云大學者夫人之學也而章句因之或問又與小子對言曰有大人之學有小子之學今案諸經傳所稱大人有以德言之者困亨貞大人吉大人不失其赤子之心是也有以位言之者大人患失而惑大人世及以爲禮是也有兼德位言之者飛龍在天利見大人大人以繼明照于四方是也從未有以年齒稱者唯閭巷常談謂長者爲大人幼者爲小人不可以說經俗講或以位言或兼德位言直說大人自爲學不知是大學中教人之法其誤亦有所自來若改大人之學爲成人之學卽無病古者入大學之

年以冠爲期故冠義云冠而后服備將責成人禮焉思齊之卒章曰肆成人有德小子有造成人與小子對言非卽士之入大學者與

大學之學音胡覺切訓效論語集註云學之爲言效是也

漢儒訓學爲覺則學當音胡教切學記引兌讀爲命曰學

學半方慤云上學字宜讀曰教說命亦作教教也文王世子曰學世子學干戈學羽籥秋學禮學之爲父子君臣長幼皆音戶教反鄭注云學教也故說文學與教同教可訓覺義如以斯道覺斯民之覺主教者言也學之爲言效後覺者必效先覺之所爲主學者言也

大學一
卷一
三
大學一篇凡言學者三大學之道學兼知行而言道學也
學養子專指知一邊以條目言之格物致知卽中庸博學
審問慎思明辨之事誠意正心脩身皆中庸篤行之事故
程子曰五者廢其一非學也此兼知行之說也又有以學
與行對言者則學該問思辨好學近乎知力行近乎仁夫
人幼而學之壯而欲行之是也有以學與思對言者則學
該問思該辨學而不思則罔思而不學則殆是也有以學
與習對言者則學該問習爲思辨行學而時習之是也大
抵學以知言者十之九以行言及兼知行言者十之一隨
文生義要不失聖賢立言之本指而已

先王學校之制

禮記學記古之王者建國君民教學爲先

鄭氏立曰教學謂內則設師保以教使國子學焉外則
有大學庠序之官

古之教者家有塾黨有庠術有序國有學

鄭氏曰術當爲遂古者仕焉而已者歸教於閭里朝夕
坐於門門側之室謂之塾周禮五百家爲黨萬二千五
百家爲遂黨屬於鄉遂在遠郊之外

孔氏穎達曰古之教者謂上世也周禮百里之內二十
五家爲閭同共一巷巷首有門門邊有塾謂民在家之

大學章句 卷一
四
時朝夕出入恆受教於塾庠序皆學名國謂天子所都及諸侯國中也周禮天子立四代學以教世子羣后之子及鄉中俊選所升之士也諸侯但立時王之學故云國有學

渭按鄉飲酒義主人迎賓于庠門之外鄭注云庠鄉學也州黨曰序而此文云黨有庠者蓋鄉大夫所治之黨庠於是乎設故亦得云黨有庠其實乃一鄉之庠非此黨之所得而私也周禮州長以禮會民而射於州序又黨正以禮屬民而飲酒于序以正齒位故有謂此文當作州有序者然果係州字不應在黨之

下記者之意蓋錯舉鄉遂之學名以明庠序之徧設鄉以庠爲大故略序而不言遂降於鄉一等所設唯序故以序屬遂每鄉一庠五序遂無庠六遂凡六序學校之制詳於郊而略於野大率如此

孟子設爲庠序學校以教之庠者養也校者教也序者射也夏曰校殷曰序周曰庠學則三代共之

朱子曰庠以養老爲義校以教民爲義序以習射爲義皆鄉學也學國學也共之無異名也

陳氏祥道禮書曰鄉飲酒主人迎賓于庠門之外鄉簡不帥耆老皆朝于庠則庠鄉學名也周官州長會民射

于州序黨正屬民飲酒于序則序亦鄉學名也鄭人之
所欲毀者謂之鄉校則校亦鄉學名也然鄉曰庠記言
黨有庠州曰序記言遂有序何也古之致仕者教子弟
於閭塾之基則家有塾云者非家塾也合二十五家而
教之於閭塾謂之家有塾則合五黨而教之於鄉庠謂
之黨有庠可也周禮遂官各降鄉官一等則遂之學亦
降鄉一等矣降鄉一等而謂之州長其爵與遂大夫同
則遂之學其名與州序同可也

按漢書儒林傳三代之道鄉里有教夏曰校殷曰庠
周曰序與孟子錯互鄉庠州序周禮有明文而校獨

無徵蓋周之鄉學唯立庠序不立校也何休注公羊
傳去中里為校室此即家塾左傳云鄭人有遊於鄉
校以論執政者則似鄉亦有校豈時俗之混稱不可
為典要與

周禮師氏教國子居虎門之左

鄭曰虎門路寢門也
外畫虎以明勇猛

保氏

養國子以道使其屬守王闈

闈宮中
之卷門

蔡氏邕明堂月令論曰爾雅曰宮中之門謂之闈王居
明堂之禮又別陰陽門東南稱門西北稱闈故周官有
門闈之學師氏教以三德守王門保氏教以六藝守王
闈然則師氏居東門南門保氏居西門北門也

禮記內則虞庠在國之西郊

鄭氏曰周立小學於西郊

按天子之小學有二一在內門闈之學是也一在外西郊之虞庠是也

詩大雅靈臺之三章曰虞業維樅鼗鼓維鏞於論鼓鐘於

樂辟靡傳曰水旋邱如璧曰辟靡以節觀者正義曰璧體圓而內有孔此水亦圓而內有地猶如璧然土之

高者曰邱以水繞邱所以節約觀者令在外而觀也

文王有聲之六章曰鎬京辟靡自西自東自南自北無思

不服皇王烝哉箋曰武王於鎬京行辟靡之禮自四方來觀者皆感化其德心無不歸服正義曰辟

靡之禮謂養老以教孝弟也

張子曰靈臺辟靡文王之學也辟靡之在鎬京者武王之學也辟靡至此始為天子之學

靈臺辟靡猶遵諸侯之制及武王有天下宜加壯麗故更立辟靡于鎬京由是遂為天子之學而諸侯不得立焉周頌曰振鷺于飛于彼西雝傳曰雝澤也故先儒以為澤宮即西郊之虞庠恐非王氏曰辟靡有水鷺所集也文王作豐有辟靡矣武王作鎬又作辟靡則靡有東西矣今按後漢書注引韓詩薛君章句曰西雍文王之雍也王說本此當從之鄭康成云豐在豐水之西鎬在豐水之東相去蓋二十五里據此

則靈臺辟廱武王時在鎬京之西故指為西雝也史記

封禪書禮高有天子辟池索隱曰即周天子辟雍之地三輔黃圖文王辟雍在長安西北四十里括地志辟雍靈沼今悉無復處惟靈臺孤立高二丈周回一百二十步元和郡縣志周武王宮即鎬京也在長安縣西北十八里自漢武帝穿昆

禮記內則有虞氏養國老於上庠養庶老於下庠夏后氏

養國老於東序養庶老於西序殷人養國老於右學養庶

老於左學周人養國老於東膠養庶老於虞庠鄭曰皆學名也異者

四代相變耳孔曰養老必在學者以學教孝弟之處故於中養老熊氏云國老謂卿大夫致仕者庶老謂士也

陳氏禮書曰四代之學虞則上庠下庠夏則東序西序

殷則右學左學周則東膠虞庠而周則又有辟廱成均

瞽宗之名則上庠東序右學東膠大學也故國老於此

養焉下庠西序左學虞庠小學也故庶老於此養焉記

曰天子設四學蓋周之制也周之辟廱即成均也東膠

即東序也瞽宗即右學也蓋成均居中其左東序其右

瞽宗此大學也虞庠在國之西郊則小學也記曰天子

視學命有司行事祭先師先聖焉卒事遂適東序設三

老五更之席又曰食三老五更於大學所以教諸侯之

弟祀先賢於西學所以教諸侯之德夫天子視學則成

均也命有司行事祭先師先聖焉即祀先賢於西學也

祀先賢於西學則祭於瞽宗也有司卒事適東序設三

老五更之席卽養國老於東膠也養國老於東膠卽禮
三老五更於大學也然則殷之右學在周謂之西學亦
謂之瞽宗夏之東序在周謂之東膠亦謂之大學蓋夏
學上東而下西殷學上右而下左周之所存特其上者
耳則右學東序蓋與成均並建於一邱之上而已由是
觀之成均頌學政右學祀樂祖東序養老更右學東序
不特存其制而已又因其所上之方面位之也

禮書此論最爲精覈惟謂辟廱卽成均而不言上庠
未免滲漏按文王世子云禮在瞽宗書在上庠則有
虞氏之制周實脩而用之爲養老學書之地矣昔夔

爲樂正見左傳典樂教胄子當在上庠而周官大司樂

掌成均之灋以治建國之學政大司樂卽王制之所

謂大樂正也其官職與夔同而董仲舒云成均五帝

之學故虞之成均別名上庠而周之上庠亦曰成均

則成均卽上庠可知辟廱乃天子承師問道之所非

大司樂教國子之地不得名成均也王氏周禮詳說曰五帝之學名

失其傳所傳者總名成均耳成均國之大學所謂養國老於上庠是已蓋命夔典樂教胄子其制詳於有

虞此周之學名必取於虞氏之庠五帝之成均得無意乎謂右學東序與成均並

建於一邱之上亦非蓋惟辟廱建在水中之一邱而

三學環之於外水北爲上庠一名成均水東爲東序

一名東膠水西為右學一名瞽宗又稱西學蓋皆存舊制而被之以新號是為天子設四學也

祭義天子設四學當入學而天子齒

山陰陸氏佃曰天子立四學并其中學而五直以一處並建周人辟廱則辟廱最居中其南為成均其北為上庠其東為東序其西為瞽宗當學禮者就瞽宗學書者就上庠學舞干戈羽籥者就東序學樂德樂語樂舞者就成均辟廱唯天子承師問道養三老五更及出師受成等就焉當天子入大學則四學之人環水而觀之矣是之謂辟廱學禮曰帝入東學尚親而貴仁東序是也

帝入南學尚齒而貴誠成均是也帝入西學尚賢而貴德瞽宗是也帝入北學尚貴而尊爵上庠是也帝入大學承師而問道辟廱是也總而言之四學亦大學也學記曰大學始教皮弁祭菜示敬道也又曰司徒論選士之秀者而升之學蓋東序之類若辟廱雖天子不得預故曰設四學當入學而天子齒學者所學之官也蓋辟廱非其所學之官是以云

五學之目見大戴禮及漢書賈誼傳

作成按五學名目見書大傳賈

生蓋然四尚四貴配四學絕無義理小戴不取有以

也陸氏頗附會安石新經故有此說成均者上庠之

別名非二學南北對立王者嚮明而治義取諸離南方自宜洞闢不宜更建成均以塞其前使車駕繞宮而北以至辟廱也蔡邕云辟廱水廣二十四丈四周於外周列三代之學可見周之四學只是兼設虞夏殷之三學與當代之學而為四成均即上庠無南學之制也

彥昇

按魯頌泮水疏云辟廱之宮內有館舍外無牆院漢明帝講學園橋門而觀聽由外無牆院故得園門觀之是辟廱四面有水也又按漢以明堂辟廱靈臺為三宮亦名三雍蓋其制略同云

王制天子命之教然後為學小學在公宮南之左大學在

郊天子曰辟雍諸侯曰頴音半與宮

鄭氏曰學所以學戶教士之宮

張子曰此小學是教國子胄子之幼小者未能入大學則其學在宮之左右

陳氏禮書曰諸侯之學小學在內大學在外故王制言小學在公宮南之左大學在郊以其選士由內以升於外然後達於京故也天子之學小學居外大學居內故文王世子言凡語於郊遠之於成均取爵於上尊以其選士由外以升於內然後達於朝故也

臨川王氏安石曰天下不可一日無教學不可一日廢於天下王制所謂命之教然後為學者何也曰立諸侯矣未有不命之教而不得立學也蓋古之六國也必資禮於天子所謂命之教矣

頌宮即魯頌之泮水鄭箋云辟廱者築土雖水水之外圓如璧四方來觀者均也泮之言半也半水者蓋東西門以南通水北無也其詩曰無小無大從公于邁言邁則頌宮在郊明矣辟廱只陪說或因上大學在郊遂謂天子亦外大學非也

彥昇按周立國學五虎門小學也大戴禮注小學謂虎門師保之

學也東序瞽宗上庠辟廱四學大學也鄉學三塾小

學也庠與序大學也學記中年考校鄭云鄉遂大

無大學之名亦用大學之教故亦得為大學郊學二虞庠小學也靈臺

辟廱大學也樂記云散軍郊射左射狸首右射騶

左右也左當是靈臺辟廱蓋文王為諸侯時之大學故於此射狸首也右當是虞庠虞庠是天子之小學故於此射騶虞也射義云已射于澤而后射於射宮射宮即虞庠澤即西離先儒云文王之雍也

明堂位米廩有虞氏之庠也序夏后氏之序也瞽宗殷學也頌宮周學也

孔氏曰此一經明魯得立四代之學魯以虞庠為廩以

大學
藏棗盛

陳氏禮書曰頰宮卽泮水大學也魯之大學在郊故將有事於上帝則於此先有事焉然則序與瞽宗蓋亦設於頰宮之左右而米廩其公宮南之小學歟

按孔氏學記疏云尊魯亦立四代學餘諸侯於國但立時王之學又詩泮水疏云魯有四代之學此詩主頌其修泮宮者先代之學尊魯侯得立之示存古法而已其行禮之飲酒養老兵事之受成告克當於周世之學在泮宮也據陳氏說則魯大學止兼立東序瞽宗而改虞庠曰米廩以爲小學蓋其制亦少殺於

周云

彥昇

按魯有米廩以擬天子之虞庠虞庠在西郊則米廩亦必在西郊但米廩無取賢斂才之事特於是藏棗盛因名之爲米廩非教子弟之所也陳氏以米廩當公宮南之小學豈魯獨無教子弟之小學歟蓋魯西郊有米廩以藏棗盛而公宮南之左必又有小學以教子弟猶天子有虞庠又有虎門之學也又按文王世子云王命公侯伯子男反養老子東序可知魯行養老之禮當在東序不與受成告克等事同在泮宮也又可知諸侯泮宮而

外皆得立東序一學也
子弟入學之年

大戴禮記保傅古者年八歲而出就外舍學小藝焉履小節焉束髮而就大學學大藝焉履大節焉

盧氏

辯

曰小學謂庠門

庠門一作虎門。作成按此六字後人校語舊混入注文蓋傳

寫者誤也

師保之學也大學王宮之東者束髮謂成童白虎

通曰八歲入小學十五入大學是也此大子之禮尙書大傳曰公卿之大夫元士適子年十三始入小學見小節而踐小義年二十入大學見大節而踐大義此王子入學之期也又曰十五年入小學十八入大學謂

諸子姓晚成者至十五入小學其早成者十八入大學內則曰十年出就外傳住宿於外學書計者謂公卿已下教子於家也

周書盧辯傳辯字景宣以大戴禮未有訓詁乃註之或以爲鄭康成註非也

鄱陽馬氏

端臨

曰按八歲入小學十五入大學大戴禮

保傅傳及白虎通之說十三年入小學二十入大學尙書大傳之說程朱二子從保傅白虎通又曰尙書大傳所言十三年入小學乃公卿大夫元士適子之禮蓋公卿已下之子弟年方童幼未應便入天子之學所以十年出就外傳且學於家塾直至十三方令入師氏所掌虎門小學而天子則別無私學所以世子便入小學歟

古者入學之年大抵以貴賤為差貴者生而有天下
國家之責且或有童年嗣世之事故宜早諭教以成
其德此天子諸侯之世子所以八歲而入小學十五
而入大學也三禮義宗云諸侯之子亦以十年出就
外傅在公宮之左路門之外正朝之陳
其說小異然其入大學之年各以冠為斷冠義曰凡人之
所以為人者禮義也禮義之始在於正容體齊顏色
順辭令容體正顏色齊辭令順而后禮義備以正君
臣親父子和長幼君臣正父子親長幼和而后禮義
立故冠而后服備服備而后容體正顏色齊辭令順
故曰冠者禮之始也蓋古者服備而后可責成人禮

故曰冠者禮之始入大學者學成人之禮也國君十
五而冠故十五入大學大戴禮白虎通之所言是也
由命士以上及大夫之子二十八入大學內則曰二十
而冠始學禮是也閭里之子亦八歲入塾而士大夫
之子反十歲就外傅者以貴家內有傅姆九年以前
凡六甲五方書計之事室家長幼之節早已教之矣
故需至十歲亦不妨也士大夫之子二十八入大學而
閭里之秀者反十五入大學何也其所謂大學乃庠
序非成均也三物之教易於四術故十五亦可入也
漢書食貨志八歲入小學十五入大學

按白虎通八歲入小學十五入大學此天子諸侯之
 子入學之年也尚書大傳十三入小學二十八入大學
 此公卿大夫元士之子入學之年也其所謂小學大
 學皆國學也食貨志八歲入小學十五入大學此庶
 人之子入學之年也其所謂小學即家塾大學則庠
 序也大傳又曰十五入小學十八入大學漢書儒林
傳云太常
擇民年十八已上儀狀端正者
補博士弟子蓋依大傳為制與前說異盧氏以為
 諸子姓成有早晚故晚者十三遲至十五早者二十
 改為十八理或然也古者二十而冠三十而娶亦言
其大率有故則或前或却容有
不同

鄉學之教

漢書食貨志在塾曰廬在邑曰里五家為鄰五鄰為里四
 里為族五族為黨五黨為州五州為鄉鄉萬二千五百戶
 也鄰長位下士自此以上稍登一級至鄉而為卿也於里
 有序而鄉有庠序以明教庠則行禮而視化焉視讀
日示春令
 民畢出在塾冬則畢入於邑所以順陰陽備寇賊習禮文
 也春將出民里胥平旦坐於右塾鄰長坐於左塾爾雅釋
宮云門
側之堂謂之塾郭璞曰夾門堂也門之內外
其東西皆有塾一門而塾四其外塾南鄉畢出然後歸
 夕亦如之入者必持薪樵輕重相分斑白不提挈冬民既
 入婦人同巷相從夜績女工一月得四十五日是月餘子

亦在於序室蘇林曰餘子庶子也或曰未任役為餘子師古曰未任役者是也幼童皆當受業豈論嫡庶乎八歲入小學學六甲五方書計之事始知室家長幼之節十五入大學學先聖禮樂而知朝廷君臣之禮

渭按五家為鄰即周禮之比五鄰為里即周禮之閭里胥即閭胥鄰長即比長也里有序即下文之所謂序室何休注公羊傳云中里為校室選其耆老有高德者名曰父老十月事訖父老教於校室蓋校者教也故謂之校室校室即學記之家塾鄭康成曰古者仕焉而已者歸教於閭里朝夕坐於門門側之室謂之塾是也
孔疏引白虎通云里中之老有道德者為里右師次為左師教里中之子弟又書傳

略說云大夫七十而致仕而退老歸其鄉里大夫為父師士為少師也渭按春將出民里胥坐於右塾鄰長坐於左塾此不過朝夕督察其出入而已非能教民者也右師坐右塾左師坐左塾則農隙之時教民於校室窮日而或繼之以夜班志作序室而謂里有一吏道一師道不可混也

序誤矣據州長春秋以禮會民而射於州序則序當設於州里不得有之也校室為小學庠序為大學只就鄉學中別大小與國學無涉說者不知此義或指庠序為小學或又謂鄉學無大小之名皆非也鄉學國學各自有大小不可以鄉為小學國為大學也

周禮大司徒以鄉三物教萬民而賓興之鄭口物猶事也一曰六德動而明事仁愛人聖思無不通義制事得宜忠推誠不欺和心無乖戾二曰六

行孝善於父母友善於兄弟睦親於九族婣親於外親任信於友誼恤振憂貧者三日六

藝禮玉樂鐘鼓射矢御策書文字數算以鄉八刑糾萬民一日

不孝之刑二曰不睦之刑三曰不婣之刑四曰不弟之刑

鄭曰不弟不敬師長賈曰此不弟即上六行友是也友在睦婣之上專施於兄弟此變言弟退在睦婣之下兼施於

師長五日不任之刑六曰不恤之刑七曰造言之刑八曰亂

民之刑鄭曰造言訛言惑眾亂民亂名改作執左道以亂眾也

平莽項氏安世曰賓興者所謂格則承之庸之也繼之

以八刑所謂否則威之也

三山鄭氏鐸曰教民之三物以六德六行六藝糾民則

止於六行何邪人之性有厚薄昏明之異則德不可以

皆同人之材有能與不能之別則藝不可以皆能夫六

行者日可見之行人人所當勉者也苟不修其行則害

於其身禍於其家亂人倫而傷聖治王法所不容人類

所不齒是之謂戮民加以刑可以無愧矣

正月之五章曰謂山蓋卑為岡為陵民之訛言寧莫

之懲訛言即此所謂造言也孟子曰上無禮下無學

賊民與喪無日矣賊民即此所謂亂民也造言無實

惑眾聽亂民左道違政令害教之大莫甚於此王法

之所必誅而不以聽者故八刑以是終焉

乃施教灋於邦國都鄙邦國外諸侯五等之封都鄙謂畿內三等采地也使之各

以教其所治民鄭鏞曰教法既布都鄙邦國宣化承流之職各推而行之以教其所治之民

司徒之教法既成於鄉遂乃推之於都鄙又推之於

邦國此即王制所謂天子命之教然後為學者也諸

侯之所以教一皆聽命於天子內自畿甸外薄四海

皆以鄉三物教其所治之民則道德一而風俗同治

天下猶運之掌上矣

鄉老二鄉則公一人鄉大夫每鄉卿一人

王氏曰鄉老公也尊之於鄉憲其言行不累以事故稱

老鄉老於司徒之官非屬而無職

鄭氏曰王置六鄉則公有三人也三公者內與王論道

中參六官之事外與六鄉之教其要為民是以屬之鄉

長沙易氏後曰天下達尊三鄉老兼焉故在朝稱公在

鄉稱老

黃氏度曰鄉大夫猶有職掌鄉老唯大比與賢能獻書

于王則與焉所謂師也父兄也六鄉三公為之師書曰

周公師保萬民蓋紀實也

薛氏平仲曰六官之建未聞三公之列於官也而於鄉

則見之未聞六卿為之屬者而於鄉則見之以公卿之

尊不嫌於下行六鄉之事則教化之務顧不重與

按六鄉之中有吏有師自鄉大夫以至比長皆吏也

小司徒所謂六鄉四郊之吏是也大夫士之仕焉而已者歸教於閭里則師也三公之仕焉而已者為鄉老亦師也鄉三物之教實三公主之蓋欲以小民之親遜風天下莫先於六鄉故庠序之官視樂正尤尊重焉

鄉大夫之職萬二千五百家為鄉各掌其鄉之政教禁令正月之吉

受教灋于司徒退而頒之于其鄉吏州長以下是也使各以教其

所治以考其德行察其道藝王氏曰考知其實偽察見其精粗

州長二千五百家為州每州中大夫一人各掌其州之政令教治之灋正月

之吉各屬其州之民而讀灋以考其德行道藝而勸之以

糾其過惡而戒之若以歲時祭祀州社則屬其民而讀灋

亦如之春秋以禮會民而射于州序正歲則讀教灋如初

黨正五百家為黨每黨下大夫一人各掌其黨之政令教治及四時之孟

月吉日則屬民而讀邦灋以糾戒之春秋祭崇亦如之祭者

祭日月星辰之神及山川之神見左傳國索鬼神而祭祀則以禮屬民而飲

酒于序以正齒位壹命齒于鄉里再命齒于父族三命而

不齒正歲屬民讀灋而書其德行道藝

族師百家為族每族上士一人月吉每月朔日則屬民而讀邦灋書其孝弟

睦嫻有學者春秋祭酺亦如之鄭曰酺者為人物裁害之神也故書酺或為步

閭胥二十五家為閭每閭中士一人凡春秋之祭祀謂州社黨祭族酺役政役田

若州射喪紀鄉老卿大夫之數聚衆庶既比則讀灋書其

黨飲酒於是卒者敬敏任恤者凡事掌其比饋撻罰之事

比長五家爲比每比下士一人各掌其比之治五家相受相和親有臯

奇衮則相及

長樂劉氏彘曰王都之外百里之內爲地四同而畫爲

六鄉專其德行道藝之職則三公也六卿也中大夫三

十人也下大夫百五十人也上士七百五十人也中士

三千人也下士萬五千人也上下相維禮義之俗成於

六鄉而化天下之本立矣

孟子謹庠序之教申之以孝悌之義頌白者不負戴於道

路矣

朱子曰庠序皆學名也申重也丁寧反覆之意善事父

母爲孝善事兄長爲悌頌與斑同老人頭半白黑者也

負任在背戴任在首夫民衣食不足則不暇治禮義而

飽煖無教則又近於禽獸故既富而教以孝悌則人知

愛親敬長而代其勞不使之負戴於道路矣

仁山金氏履祥曰古者道路之制輕任并重任分頌白

者不提挈不特子弟代父兄之勞凡行道之人少者皆

分代老者之任風俗敬老如此則尊君親上可知矣

按鄉三物之教法可謂詳矣而孟子一言以蔽之曰

申之以孝悌之義蓋庠序學校之設皆所以明人倫
而人倫莫先於孝悌孝悌之義明則其餘無不明矣
先是校室之教非不以孝悌而其義則未之聞也故
自閭里以升庠序者必申之以孝悌之義焉知其義
則孝可移於君悌可移於長通之於禮樂推之於朝
廷而庠序居然爲鄉之大學矣

書舜典帝曰契百姓不親五品不遜汝作司徒敬敷五教
在寬

孟子人之有道也飽食煖衣逸居而無教則近於禽獸聖
人有憂之使契爲司徒教以人倫父子有親君臣有義夫

婦有別長幼有序朋友有信放勲曰勞之來之匡之直之
輔之翼之使自得之又從而振德之聖人之憂民如此


朱子曰人之有道言其皆有秉彝之性也然無教則亦
放逸怠惰而失之故聖人設官而教以人倫亦因其固
有者而道之耳德猶惠也堯言勞如者勞之來如者來
之邪者正之枉者直之輔以立之翼以行之使自得其
性矣又從而提撕警覺以加惠焉不使其放逸怠惰而
或失之蓋命契之辭也

夏曰校殷曰序周曰庠學則三代共之皆所以明人倫也
人倫明於上小民親於下

朱子曰倫序也父子有親君臣有義夫婦有別長幼有序朋友有信此人之大倫也庠序學校皆以明此而已
次崖林氏希元曰古人建學惟在於明人倫使民親於下耳其閒俊秀成材者則升而用之今之學校惟欲養士以待用已無古人教民意思至其所以教之又只是區區文藝之末非古人所以造士之舊矣

按舜命契之辭其發端曰百姓不親五品不遜而孟子亦曰人倫明於上小民親於下可見古人之建學專爲小民而設造士其第二義也放勳之言欲多方誘掖以使之自得其性卽敷教在寬之旨也家有塾

黨有庠術有序蓋自上世已然堯舜之命契意皆在小民卽周官大司徒鄉三物之教也后夔典樂別是一大有司專爲胄子而設而國之俊選亦與焉雖其意亦主於明倫終不若鄉學盡人而教之爲化民成俗之要道也



天祿中

Blank page with faint vertical lines, possibly a ledger or table.

新入部員

新入部員の姓名を記入する欄

新入部員の年齢を記入する欄

新入部員の出身地を記入する欄

新入部員の学歴を記入する欄

